



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma : f Tir Yimiyim

tiryimiyim@aolima

tir yimiyim

TAPAK 3

Opposition-i Ajay Mishra minister menden nungi anentsütsü akhanger

Assam: Tetsür lakh 1.42 nem MFI loan ama Crore 200 agütsütsü



VOL. XIX NO. 70 (ADOK 70) DIMAPUR ROGONÜ (FRIDAY) LUCHII (DECEMBER) 17, 2021 ₹ 5.00

State nung tensa azüoktsü CM dak keta lir: K Therie

Dimapur, Luchii/Dec. 16 (TYO): State sorkar aija jembiba mapang, yimjung maparen raksatsütsü aser yimtenren ken o mapa kuma inyaka aoba atsülangtsü mechi tasa ka ama Mon district kübok Tiru Valley coal mine nung NSCN (K) amaksü sentong liasü, ta Congress party ajanga ashi.

Dimapur nung aliba Congress Bhavan nung osangbener den jembiba mapang, nüburtem tiptema lidaktsütsü ya Nagaland Chief Minister mapa lir, koba state list nung agüja lir, ta NPCC tir, K Therie-i ashi.

Tensa junga yutsütsü ya Chief Minister mapa lir. Nagaland nung tzüzüing-ozüing dak sendakba nung pa majangi kecha meinyaktet, ta pai ashi.

Iba lendong ya state sorkari matoktsüla, ibai sentong ka liasü, aji mesüra Oting nung nisung tepseta tebang agi meshiteti timtem tejashi agütsüba atema parnoki ola adoker lila, ta Therie-i ashi.

Anungji state nung nüburtem takum kumzuka ayutsü ya state chief minister aser state sorkar tebilemstü lir, ta pai ashi.

Nagaland Police dak tamang makatetba ajanga state atema Nagaland sorkari Assam sorkar dang nungi 21 Para Military Troopers ya apu asü? Aji mesüra

kechi tashi amshia parnoki Nagaland. State indang litsü telungi aittsü? Jenbuttsü atema iba ya tasa nung lir asü? Nisung aika takum samatsüba dak sendakba nung tasügangba jenti melanzüi lir, ta ashi.

Oting nung nisung jenti tepsetba ya Naga nung nüjiso atema küm 93 raraba mapang yirur alidak metsü inoktsüba lir. Ajak abensa aser peria aliba lima ka nung aibelen ajeteta takum agiba ya kecha agia malanzükket, aser tesunep nung aliba nüburtemi ochi obendang atema kisüing sarasademer, ta NPCC tiri ashi.

Ibai aibelen ajetetba ka lir ta Union Home Ministry ajanga nangzükogo aser Nagaland MP Tokheho Yephomi-ia yangji NSCN (K) züingsemtem senzür ta itdangiter nungi osang arua liasü, ta ashi.

Anungji aibelen ajetetba ya NSCN (K) alitsü. Ibai Government of India tsütsü nungi ceasefire alema inyaktsüba tebilemba ka liasü.

Aibelener tem aputsü, Oting lendong bushiüingdangtsü asoshi all Party Parliamentary Committee ka tentetsü aser President Rule kübok yimtenren ken o shidak inyaktsü atema Governor ajanga India Tir nem Congress party ajanga takhangba ka agütsüogo, ta paisa ashi.

COVID-19 Nagaland: Case tasen asem aser tasüba ka liasü

Kohima, Luchii/Dec. 16 (TYO): Nagaland nung Brehostibarnü nisung tasen asem dak COVID-19 putet aser ka süa iba tashidak agi menepet nisung tejangja 32,164 jungogo.

Cases tasen ya Dimapur district nung putet aser kasa mapang iba tashidak nungi taneptsü angur Mokokchung nungi pungo aser Dimapur nungi ka liasü, ta tate Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi.

State nung coronavirus tashidak nungi taneptsü angur nisung 30,310 jungogo aser taneptsü anguba rate ya shilem 94.24 alitsü.

Tang state nung COVID-19 active cases 85 lir, aser item rongnung nisung 16 dak iba tashidak agi temang nung timtem agütsüba sümia lir, ka kanga mejungi kangshir aser nisung 68 dak temang nung timtem kecha mali, ta pai ashi.

Dimapur nung COVID-19 tashidak puteta alir ka asüba ajanga state nung iba tashidak keter agi asür nisung 701 jungogo aser item rongnung nisung 16 dak danga tashidaka liasü, ta Dr Kikon-i ashi.

COVID-19 tashidak agi menepa alir nisung 1,068 danga state temi ogo, ta pai ashi.

Tang tashinung Nagaland nung COVID-19 tashidak alitsü temolung melemi sample 4,19,116 tendangogo. Item ya RT-PCR nung 111,751, TrueNat nung 89,513 aser Rapid Antigen nung 2,17,852 tendanga lir, ta Dr Kikon-i ashi.

Bodhbarnü tashinung Nagaland nung nisung 755,798 nem COVID-19 vaccine doses 13,24,344 agütsüogo, ta State Immunization Officer, Dr Ritu Thurr-i metetdaksü.

State nung vaccine agir alirtem ya frontline nung inyaker nisung 60,983, healthcare nung inyaker nisung 16,004, arishi küm 45 nungi tema nisung 213,278 aser arishi küm 18 nungi 44 tsüingta nisung 465,533 alitsü, ta pai ashi.

Nisung 568,546 nem vaccine dose tanabuba agüja parnok iba vaccination course tembangogo. Parnok ya frontline nung inyaker nisung 48,579, healthcare nung inyaker nisung 13,532, arishi küm 45 nungi tema nisung 177,349 aser arishi küm 18 nungi 44 tsüingta nisung 329,086 alitsü, ta Dr Thurr-isa ashi.

Kohima district nung Unlock-8 maneni alitsü: DC

Dimapur, Luchii/Dec. 16 (TYO): NSDMA ajanga totuyuba agütsüba den bendenloksema aser Deputy Commissioner indang office janga October 28, 2021 nü (Unlock-8) sangdongba nung shia aliba talenba aser salaba tem Kohima district nung maneni

alitsü, ta Deputy Commissioner, Kohima, Gregory Thejawelie NCS ajanga sangdong ka nung ashi. Iba totuyuba ya December 15, 2021 nungi tenzüka January 15, 2022 tashi alitsü, ta kasa sangdong ajanga ashi.

Eastern Nagaland nung nüburtemi longkak ait



December 16, 2021 nü Konyak Union-i Mon nung rally ayongzuka aliba noksa nung angur..

Dimapur, Luchii/Dec. 16 (TYO): Ita tetenzüklen Oting nung Indian Army temi mita atar civilian 14 tepsetba asoshi temeden bushia Eastern Nagaland district tem nung Brehostibarnü nisung meyririjang aika yimti-yimtung nung adenshia liasü.

Nagaland anüdoklen Tuensang, Mon, Longleng, Kiphire aser Noklak district tem nungi Eastern Nagaland Peoples' Organisation (ENPO) ajanga ayongzükba ama lokti ajungai longkak aitba sentong nungya shilem agia liasü.

Lendong atalokdak Mon district nung ghonda 11 mokdangtsü ayongzuka liasü. Konyak Naga kin indang lokti tulutiba, Konyak Union-ia iba rally ya ayongzuka liasü.

Hopta tetenzüklen Konyak Union aser ENPO ajanga Eastern Nagaland nung danga civil society tem den shisa agitepba sülen

nisung tepsetba nung shilem agirtem pua tapet temerenshi magütsü tashi armed forces den amalitep makatsü, ta sangdonga liasü.

Security forces temi pei kumzüktsü mechi injang khaloktsü, ta Union Home Minister Amit Shah-i Parliament nung jembiba ojang ya agientsüla aser Nagaland nungi Armed Forces Special Powers Act (AFSPA) ya agientsüla, ta ENPO ajanga takhangba agüja lir.

Brehostibarnü lokti tentet balalai India Tir dangi züluba shidi ka Deputy Commissioner, Mon nem agüja liasü. "Onoki anogo 30 züingzükja lir, aser iba mapang obendang shidak magütsüra onoki military forces den maneni amalitep malitsü," ta Konyak Union nung tatong tir, Hanong Konyak-i ashi.

Tarutsü anogotem nung longkak aitba ya Nagaland nung danga tesemtemia aotsü aser

nüngdakra Delhi tashi aotsü. "Ibai tang ang tenzüker aser tanem tanemi tuluba akumtsü," ta pai ashi.

Longkak aitba mechi Nagaland sorkar indang cabinet senden ka Brehostibarnü amentsü aliba December 18 nü amentsü renem.

Iba senden nung AFSPA indang tongtipang süa jembitsü, ta sorkar indang odongtar Mmhonlumo Kikon-i ashi.

Oting nung lendong ataloker anogoka lir, Nagaland nungi AFSPA agientsü atema Centre dang asügangdangogo, ta Chief Minister Neiphiu Rio-i shia liasü.

Tasüingji Nagaland Cabinet ajungben senden ka mena Home Ministry dang iba Act ya agientsü atema ayongzüktsü telemtetba agia liasü.

Iba Act indang jembitsü atema December 20 nü Nagaland Assembly session temeja ka amentsü ayongzuka lir.

Union Home Minister-i yimjak nung tatok meshitsüla: Naga Hoho

Dimapur, Luchii/Dec. 16 (TYO): Parliament nung Union Home Minister, Amit Shah-i sangdong meshidak agütsüba ya khenyongi magizükter, ta Naga Hoho ajanga sangdong ka nung ashi.

Mon district kübok Oting lendong ya asaa inyakba ka lir ta kuli agi sayur, saka Union Home Minister-i miimbangtsü meranga "Mistaken Identity" aser "in Self-Defence" nung inyak, ta ashiba ya tagizükketla masü. Parliament nung sangdong tiazü agütsüba ya danga kuli ka lir, anungji mita atar amakba tasa ya 21 Para Commandos indang political masters tem mapa lir ta angateter, ta ashi.

Government of India ajanga security forces nem AFSPA amshitsü tashi agütsüba ya nüburtem senzütsü aser pei bilemba temeden ajemreptsütsü

merangba ka dang lir, aser iba jagi India indang constitution nung mela aliba den mapet kumdaktsür. AFSPA ya meimchir temeden nung indang indanga aibelenba ka lir aser alima nung democratic linük tulutiba ta asükuma India-i jembiba ama masü. International sabang nung India ya yimjung ayur ta sangdongba ya temenünitsü mapa ka lir, kechiaser nüburtem nem timtem balala agütsütsü atema tashi amshir, ta Naga Hoho-i ashi.

Framework Agreement nung meyonngem agütsütepba sülen Naga nungertemi Political Solution ka imla aliba Amit Shah-i Home Ministry ketdangtsütsü agizükba sülen teimla sama aor. Naga yimten ken o angatetepa jembitsü melen a Government of India-i Naga nung alidak tesa mejungi kumdakja tai maketba nisungtem reshikangshia

amshir aser tepseter aser parnoki jembiba ama meinyaker, ta ashi.

Union Home Minister Amit Shah-i Parliament session alidang house nung sangdong meshidak agütsüba atema pai tekeratiba nung nüburtem matsüingdang tatok meshitsüla, ta Naga Hoho-i ashi.

Government of India-i Northeast aser talisa Naga nung aliba tesemtem nungi AFSPA agientsüla. Maneni Nagaland nungi Disturb Area agientsüla, koba agi nübur asoshi tajung inyakba dang tamajung inyakba tali lir.

Tarutsü nung Indian Military Forces temi meshidakba nung AFSPA mamshidaktsütsü mechi aser nüburtem atema tekeratiba nung Indo-Naga yimten ken o tembangtsüla, ta kasa sangdong ajanga ashi.

Kohima DC-i COVID guidelines tem atema metetdaksür

Dimapur, Luchii/Dec. 16 (TYO): COVID-19 asoshi vaccine dose anaprong mesüra dose mezüngbuba agir anogo 15 sülen yimyatem shidak amshia Kohima district kübok lokti adenshiba tesemtem nung nüburtem shilem 50 dak tema aser shilem 100 tashi adenshitsü melar, ta Deputy Commissioner, Kohima, Gregory Thejawelie NCS ajanga sangdong ka nung metetdaksü.

Kohima district telungzük nung passenger amenba garitem nung shilem 50 dak tema aser shilem 100

tashi amener ajanga COVID-19 atema vaccine dose anaprong agir alitsüla, mesüra dose mezüngbuba bo agir alitsüla aser mezüng dose agir anogo 15 bo junger asütsüla, aser talisa mask agir alitsüla, ta sangdong ajanga ashi.

Vaccination criteria nung shia aliba ama masürtem, driver/teyariteper aser passenger tem senzüsempongtsü ghonda 72 tsüingta RT-PCR/TrueNat/CBNAAT ajanga tendangba COVID-19 negative report sayutsüla, ta ashi.

Kohima district-i aitba gar

ajanga aser Kohima district telungzük nung lokti adenshiba ajanga mashi mapang reprangtsü aser aibelener lira tapet mera agitsü, ta sangdong ajanga ashi.

Kohima district telungzük nung nüburtem aliba tesemtem nung nisung kar danga mask magi senzüba ngura senchi sen 200 achitsü.

Shia aliba item totuyuba sülen manidaker nem Disaster Management Act 2005 aser Indian Penal Code indang Section 188 kübok merenshitsü, ta sangdong ajangasa ashi.

Kohima nung Peace Angel Rally ayongzüka agiogo



Minister of Higher Education, Temjen Imna Along-i "Peace Angel Rally" lapoktsüdang tangokba noksa nung angur.

Dimapur, Luchii/December 16 (TYO): "Universal Peace and Harmony" omen nung ajemdaker December 15 nü Peace Angel Rally ka agiogo. Iba rally ya Sokhriezie Park nung tenzük aser Ura Academy, Kohima nung tembanga liasü. Minister of Higher Education, Temjen Imna Along iba sentong nung alakmeta jaoker liasü. Peace rally tenzüksüba sentong nung Along-i, Peace rally ayongzüka agiba ajanga state aser linük nung aliba nüburtemi lenla ajak nung

yimjung asoshi nisungshia yimjung nung alitsü atema merangtsü atema ajungmesotsü, ta ashi. Paisa sentong nung shilem agirtem aser bramakumaris nem tenüngsang agüja liasü. Pai, rally ayongzüka organization nem tenüngsang agütsü. Iba lokti tentet yagi nüburtem timtem tekangshi nung aliba koktettsü aser lokti longjemdaktsütsü atema inyakba atema alima ajungai jangjaa lir ta ashi. BK Sister Rupa Raj-i ashiba agi, Brahma Kumaris ya

spiritual movement ka lir, koba 1930s mapang Hyderabad nung tenzük. Laisa, iba lokti yagi kin, linük, tamangba yimsü aser gender mebendangi alima sobaliba ka amenoktsü atema tesayuba agütsür. Iba lokti tentet yagi ashiba agi, 2008 küm parnok kübok linük 100 nung centre 8500 nung regular kaketshir 825,000 dak tema liasü. BK Sister-isa, education aser meditation koda tongtibang iba indang jemi aser BK Brother Vinod-i, iba lokti nükjidong lemsatepa liasü.

Home Dept-i online ILP indang osang agütsü

Dimapur, Luchii/December 16 (TYO): State Home Department sangdong ka ajanga, Bengal Eastern Frontier Regulation, 1873, Section 4 nung tashi agüja aliba aser 08.11.2019 nü office sangdong dak ajemdaker online application atema provision aser Inner Line Permit (ILP) issue asütsü atsülangtsüba metetdaksüogo. Non local shishilembar, aayangertem, kakethirtem aser putirtem shirnok Nagaland-i aitsü aser khen atema Nagaland nung alitsü atema ILP nüngdaker parnok atema Home Department office-i Inner Line Permit dak sendakba nung provisions latetja aliba dak ajemdaker iba jenjang agiogo. Kasa sangdong ajanga, www.ilp.nagaland.gov.in nung tenüngdakba kuli kakets, noksa, Government recognized photo IDs, address proof aser taa agüja züngoksemba sülen nisung kati online ILP issue asütsü atema application benoktettsü.

download sütettsü mesüra print sütettsü. Maneni ILP card soft copy ka applicant tem indang email-i yoktsü aser iba den registered mobile number dangi ILP number aser validity indang SMS ka yoktsü. ILP digital copy mesera hard copy ya Government recognized photo ID den külemi bener senzürä valid ILP document ama züngshitsü. Guarantor tema osang tejangja a g ü t s ü r www.ilp.nagaland.gov.in nung züngoksemttsü nüngdaker. Guarantor ajak nem unique number ka agütsütsü, koba ILP applicant temi fill up asütsüla, iba sülen Guarantor nem pa/la indang phone nung OTP ka yoktsü koba applicant tem nem pa/la application fill up asütsü atema agütsütsü nüngdaker. Iba ajanga Guarantor temi pa/la tenüng Guarantor ama amshia aser ILP agizüksü atema pa/la indang unique number amshia kari danga application benoker mebenoker jangjatsü.

Home Department sangdong ajangsa, shishilembar, aayanger, kaketshir aser alima penzürtem atema online ILP module ya 2021 küm November 8 nü nungi inyaksangshi tenzükogogo. Iba sentong ya Chief Minister, Neiphu Rio-i 2020 küm December 16 nü pa indang office nung tenzükja liasü. Iba sentong nung Advisor, Information Technology & Communication, Science & Technology, New & Renewable Energy, Mmhonlumo Kikon-ia shilem agia liasü. Online ILP module ya tang benoka aliba ILP inakyim den saku dang aser Home Department, Government of Nagaland tawabangba kübok Department of Information Technology and Communication, Government of Nagaland-i achaayanga inyaksangshidar. Online ILP agizüknertemi online site www.ilp.nagaland.gov.in semdanga pei phone number amshia züngoksemtettsü aser tenüngdangba kuli kakets ajak benoktsüla. Application fill up sür alibattem ya Deputy Commissioner tem dangi electronically transmit asütsü. Kuli kakettes asadanga nisung ka ILP agizüksü temsüa lir ta jangjaba sülen ILP agütsütsü atema temelaba agütsütsü. Deputy Commissioner-i temelaba agütsüba sülen applicant temi portal nung ILP taa agütsütsü aser taa agütsüba sülen applicant temi ILP card

ILP online agizüksü atema benokba nisungba indang Guarantor-ia website nung tetuyuba agüja aliba dak a j e m d a k e r www.ilp.nagaland.gov.in nung Govt. recognized Photo IDs, address proof aser tanga tenüngdakba kuli kakettes benoktsü nüngdaker. ILP card digital copy mesera hard copy ya Government recognized photo ID den külemi bener senzürä valid ILP document ama züngshitsü. Online ILP facility ya tang ILP agizüksü atema manual/offline mode den

Kohima DC-i metetdaksür

Dimapur, Luchii/December 16 (TYO): Deputy Commissioner Kohima, Gregory Thejawelie NCS-i sangdong ka ajanga New NST nungi Rutsa Bakery tashi nung anepdang 8 ako nungi aonung 7 ako tashi gari manendaktsüi aliba December 15 nü nungi tenzükä salatsüba

metetdaksüogo. Kasa sangdong ajanga ashiba agi, New NST nungi Razhu Point ajanga Khuochiezhie (Local Ground) North Gate tashi lenmang nung khutem gari nung belenokba aser belenzükba maparen aonung 7 ako nungi 8 ako tashi nung inyaktsüla.

DHE-i registrar den tepila sentong ayongzüka agi

Kohima, Luchii/December 16 (TYO): Directorate of Higher Education Nagaland-i registrar, higher education, Nagaland Sedele Lohe den tepila sentong ayongzüka agiogo. Director higher education, Nagaland Dr. Apeni Lotha aser UDA Benedict Ed. Shitio nati sentong nung o jembia liasü.

Sedele Lohe-ia iba sentong nung o jembia liasü. Registrar den tepila sentong ya computer programmer, higher education Tol Pucho lenisüba nung agi. Joint director Higher Education Rokono Keyho-i sentong nung Tsüngrem temoatsü meshizüka sarasadem aser Arenchenla Walling-i ken tajung ka aten.

Zhaleo-i TUD office complex tasenba atema nüngshilong azüngtsü



Tenyimi Union Dimapur indang Office Complex tasenba nüngshilong azüngtsüba sülen Zhaleo Rio aser ketdangsurtem tangokba noksa nung angur.

Dimapur, Luchii/December 16 (TYO): Advisor, Sericulture, Excise & Minority Affairs Zhaleo Rio-i, Tenyimi Union Dimapur office complex tasenba atema nüngshilong azüngtsüogo. Sentong nung tajungshi o tatsüka ka jembiba mapang Rio-i, küm 46 tejakdang Union tenzükba sülen Tenyimi nüngertem talangka aruogo. Pai, sentepa aliba lokti dang temeim aser telongjem ajanga tesendaktep tali akangshitsü ayongzüka. "Temeim aser yimiyimpong tajung prokshitsü mapang tongogo aser iba ya kin 11 yongtsü nung dang masü saka Dimapur nung aliba nüburtem ajak dangi prokshitsüla," ta pai ashiba den Naga nunger ajungkettsü aser yimiyimjung atema longjemer inyaktsü ayongzüka liasü. Kuli tejangja makai Naga

nungertem dak yimiyimpong tamajung prokshitsü yimya keta aliba atema sasa bilemba lemsatepba den pai "asenoki tanga kintem yimya tajung aser inyakyim angazüka benshitsü nüngdaker aser iba ajanga asen lokti ajangzüksü," ta ashi. Rio-isa, office complex tasenba asütsü atema paia teyari agütsütsü nangzüka aser Tenyimi nüngertem ajaki pei akokba yari teyari agütsütsü nüngdaker ta ashi. Lenirtem nongita yaritsü ayongzüka mapang Rio-i, tarutsü tajungba ka asoshi tangatettep, tesendaktep aser telongjem kanga nüngdaker ta ashi. Pai, nüburtem dang küm tasenbai ayaoka aiba mapang maneni lepa reprangshitsü aser tarutsü nung tetsükdaktsütem ajak asadanga longjemer tejakdangi aotsü, ayongzüka.

Kiphire jila nung leper semzükogogo

Dimapur, Luchii/December 16 (TYO): Kiphire jila nung December 15 MLA & Chairman DPDB, T. Yangseo Sangtam-i leper semzüksüogo. Sentepa aliba lokti den ojembiba mapang Yangseo-i, iba leper ya Kiphire jila nung aliba nüburtemi achaayanga aser teyari agütsüba ajanga mesemtetogo, ta ashi. Paisa, taoba mapang lenmang junga maliba ajanga nüburtem kanga timtema liasü, ta ashi. Yangseo-i, Kiphire nung aliba nüburtem dang leper temeket meremejua ayutsü atema ajungshia liasü. Paisa, ali tenla agütsürtem, anisüngzükdak semtu tenla

agütsürtem aser maparen takok asoshi teyari agütsür ajak nem tenüngsang agüja liasü. Ali aser anisüngzükdak semtu tenla agütsürtem nem MLA-i pelaba temaitsü kuli kakets agüja liasü. Sentong nung lokti pelaa agizükba o Kiphire Town Wards mendenbuba Lesithrong-i jemi aser Secretary, Common Graveyard, Dr. H. Apise-i tepela anküp o jembia liasü. Iba sentong ya Baptist Pastors' Fellowship Kiphire Town tir Alison-i lenisüba nung agi. Iba sentong nung USLP, ESH, TTC tribal hoho tem, Pastor, GB, Hindu aser Muslim lokti nungi lenirtem aser kiyong balala lenirtemi shilem agia liasü.

Myanmar-i RPF telungpur 5 Manipur Police nem bendanga agütsü



Imphal, Luchii/December 16 (Agencies): November 13 nü telungpurtemi armendanga atar Assam Rifles convoy ka amakba sülen Manipur maneni defence experts aser paramilitary personnel temi kanga kümdanga meita atadar.

Iba amala tensa ka nung state aliba mapang Myanmar sorkari Bodhbarnü tenokdangba agütsür aliba telungpur telok Revolutionary People's Front (RPF) züngsem pongu Manipur Police nem bendanga agütsüogo. RPF ya People's Liberation Army (PLA) den sendaktepa lir.

Itangitrtemi ashiba agi, telungpurtem ya 'Operation Sunrise' ta nüngja agütsür Myanmar Army-i, Sagaing tesem nung amenoka aliba

Northeast India nungi telungpurtem meita aoba setong ka ayongzüka agiba mapang apu.

Telungpurtem meita aoba mapang Myanmar Army-i Monywa tesem nung telungpur pongu apu. Telungpurtem apuba sülen parnok Myanmar yimtiba Mandalay nung tepuokdak yua liasü.

Manipur nung amenoker aliba telungpurtem ya Indian Air Force tayimtsü ka ajanga state-i anir aru aser parnok Bodhbarnü 11 ako shi nung Bir Tikendrajit International Airport, Imphal tonga liasü.

Manipur Police ketdangsür tejen kati ashiba agi, telungpurte ajak ya tesem kati anir ao aser parnok dang ketdangsürtemi ken o ashishidar.

Imphal Free Press sangdong ka ajanga ashiba agi, telungpurtem ya Naredra Nongmaijing, Loitongbam Rajkumar, Thokchom Kalasana, Salam Somendra aser Chaoren Rohen ta jangjaogo.

Temetetsükaji December 13 nü Assam Rifles convoy ka telungpurtemi amakba sülen Manipur ya sepaitemi kanga kümdanga meita atadar. Iba lendong nung 46 Assam Rifles Khuga Battalion Commanding Officer, Colonel Viplab Tripathi, pa kinungtsü aser arishi küm 8 tain jabaso ka asü. Par kinungertem den ano paramilitary personnel - Rfn Suman Swargiary, Rfn Khatnei Konyak, Rfn RP Meena, aser Rfn Shyamal Das nungera telungpurtemi tepseta liasü.

Dhubri district nung ali atsünga agir kibong 24 meindok

Dhubri, December 17, 2021 (Agencies): Assam kübok Dhubri district nung Forest department-i Bilasipara Circle ketdangsürtem den külemi Sonamukhi Lotea nung ali atsünga agirtem meindok.

Bilasipara Circle Officer Shantanu Gogoi-i anir külemi iba mapa inyak, ta Dhubri Divisional Forest Officer Dipak

Chandra Deka-i ashi. Tokrabandha Proposed Reserve Forest (PRF) nung Sonamukhi Lotea nung Bengali oshi jembiba Muslim nung teimba alir aser parnok ya ozüing alema ali atsünga agirtem ta ashir.

Ali hectare 5 jungnüa atsünga agiba kibong 24 tashi Hombarnü ketdangsürtemi

meindok. Ali atsünga agirtemi iba tesem nung lungkak aittsü merang saka parnok kulikaket tejangja kecha magütsütet aser iba jagi meindok.

"Dhubri district kübok tesem balala nung kasa mapa inyaktsü. Forest ali atsünga agirtem meindoktsü" Divisional Forest Officer, Dhubri Dipak Chandra Deka-i metetdaksü.

Dibrugarh nung Brahmaputra Utsav mungdar



Dibrugarh, Luchii/December 16 (Agencies): Azadi Ka Amrit Mahotsav nung shilem ka ama Dibrugarh district nung Brehostibarnü nungi Brahmaputra Utsav amung tenzüko.

Brahmaputra Utsav ya December 12 nü tembangtsü. Brehotibarnü iba sentong ya Dibrugarh Municipal Board office nungi Brahmaputra ayong anasa Puja Ghat tashi Eco Walk sentong ka agia tenzüko.

Iba den ano Puja Ghat nungsa merekmejuba sentong aser drawing aser otsünü

tetoktepa ayongzüka agiogo, kong arishi küm mebendangi tanur tain ajaki kasa shilem agiogo.

Iba benjung amungba mapang Lejai-Kalakhowa nung Raidongia Dol indang kerak yanglu ya anonung milen tsükloka sawadaksütsü.

Hokolbarnü anepdang 7 ako nung bicycle rally ka Deputy Commissioner indang Office nung tenzüksü aser Khanikar adena orr Sessa bridge nung tembangtsü sentong yanglua lir.

Maneni Hokolbarnüsa anepdang 8:30 ako nung

Multipurpose Sports Stadium nung Yoga sentong ka ayongzüksü.

Hokolbarnü nikongtsütsü sentong Assam Water Resources Minister Piyush Hazarika-i tenzüksütsü.

Sobaliba sentong nung nüngtugu local kentertemi shilem agiba angutsü. Dibrugarh MLA Prashant Phukan-ia iba sentong nung shilem agitsü.

Iba sentong nung shilem agitsü jaokertem ajak nem tetushi agütsütsü aser tetushi agütsüba sentong ka ayongzüka agitsü.

Arunachal Pradesh: NPP züngsemtem BJP nung aden

Itanagar, Luchii/December 16 (Agencies): Yimden yimsüsüba nung temelenshi adoka Tawang district kübok Lungla constituency nung sentong ka agiba mapang National People's Party (NPP) züngsem 206 Bharatiya Janata Party (BJP) nung denogo.

Osang ajanga ashiba agi, NPP züngsemtem rongnung tetsür aser tebur densema lir, shirnoki 2019 Assembly election nung NPP candidate Jampa Thirny Kunkhap pusema liasü. Temetetsükaji Kunkhap-i taoba mapang BJP candidate aser Lungla MLA Jambey Tashi den toktepa liasü, shiba election vote 1,288 agi takok angu.

BJP nung oa adenba NPP züngsemtem ya Kunkhap'er

yimtsüng aser temeket nung aliba yimtsüngtem nungi lir.

MLA Tashi ya RWD minister advisor lir aser senong agiba mapang pai züngsem tasentem BJP-i pelashishia agizük.

Paisa, candidate ka asoshi tetsükdaksü tulutibaji parnok den tokteper tsükdaksütsüba masü saka iba tesem nung sensak tia aser tanga tebilemstütem bentetsüba ya lir, ta ashi.

Osang benertem den sensaksemba mapang MLA-isa, "democratic linük ka asüba tebur ajungji, kin, jenjang kecha tebandang makai nisungshiai pa mesera la indang candidate shimteter. Iba ajanga onok nem asadangshitsü atema nükla aser mapang agütsür," ta ashi.

Assam: Tetsür lakh 1.42 nem MFI loan ama Crore 200 agütsütsü



Finance Minister Ajanta Neog

Guwahati, Luchii/December 16 (Agencies): State nung tetsürtem jenjang ajungkettsü nükjidong nung Assam sorkari Assam Micro Finance Incentives & Relief Scheme kübok phase-I, tanabuba shilem nung district trok nung Micro Finance Institutions (MFIs) nungi sen apur aliba tetsürtem nem incentive agütsütsü telemtetba agiogo.

Ano iba scheme tanabuba shilem nung sorkari MFI loan methi agütsüba tetsürtem nem incentive agütsütsü. Sorkari sen crore 200 ana intoka incentive agütsütsü. District trok rongnung Baksa, Biswanath, Bongaigaon, Dibrugarh, Dhemaji aser Chirang densema lir.

MFI loan incentives aser relief ya taoba Assembly

election nung BJP-i aniba sorkari agütsütsü nangzüka rongnung tongtibang onük ka liasü.

Sorkari district trok nungi incentives agizüktsüpur beneficiary lakh 1.42 shimogo. Iba scheme Phase-I, mezüngbuba shilem nung sorkari district teku nung aliba tetsürtem nem incentives agütsüba nung sen crore 320 intokogo.

State Finance Minister Ajanta Neog-i, MFI nungi loan agirtem nem incentives agütsütsü atema district trok indang deputy commissioners tem den sensaksemogo. Lai commissioner tem dang iba scheme ya takok ngua benoktettsü atema inyaksangshitsü metetdakja liasü.

Assam: Taoba ACA secretary puogo

Dibrugarh, Luchii/December 16 (Agencies): Taoba Assam Cricket Association (ACA) secretary Pradip Buragohain, ochi mashi ken o nung aija Dibrugarh kübok Tingkong tesem nung puogo.

Fatasil Police station, Guwahati nung Indian Penal Code (IPC) dak ajemdaker benoka aliba ken o nung aija Fatasil Police team kati pa puogo.

ACA secretary mapa bener aliba mapang ACA indang fund crore aika mashiymi amshiba atema ACA-i Buragohain anema ken o benoka liasü.

Kasa mapang nung ACA-i, accounts asadangshitsü aser

senotsü mashiymi amshiba atema ken o benoka aliba jangjashitsü atema züngsem pongu agi kümtetba verification committee ka sports organizer Jamshed Khan lenisüba nung tentettsüogo.

Verification committee-i, cricket asayamung balala nung hotel room aser air ticket book asüba aser chiyongtsü nung sen intokba nung sen crore 50 shi mashiymi amshir alitsü ta bilemer.

Taoba secretary ya committee matsüngdang nokdakogo aser pai senotsü amshiba indang rateta shiogo. Ajsüuka pai telangzüba agütsüba dak committee-i temulung masür.



TIR YIMYIM YIMOBILEM (EDITORIAL)

DIMAPUR ROGONÜ, LUCIII (DECEMBER) 17, 2021

Election shitak agitsü atema

Magiteter dang ashi election shitak timi agitsüba ya ajaki bilemer, kechiyong election shitak magitetba ajanga shinga majangzüker. Iba tangatetba nungji linük nung election shitak timi agitsü asoshi Union Cabinet-i tang temendakba tatar senden nung ken o kar benoktsü lemteba jagi election tajungba aser temerükba agitsü merangba mapa nung teyari tuluka agütsütsü. Union cabinet-i tatar senden nung benoka ozüng küma latettsü renemba onüktem rongnungji, electoral roll nung voter tenüngtemji Aadhaar number den sendakteptsü aser election nung toktepertemi affidavit nung pei akaba rongsen aser azüngba amala pei taküm dak aketba temetettsütem meshitaki zülura, temerenshi küm ana tepuokdak ayutsü. Item ama election dak sendakba maparen nung temelenshi nungdakbatem ya ozüng küma kodang amshitsü tenzükdir, metetmeteta, electoral roll merüktettsü aser election nung toktepertema tali ochi tashiba akümtsü. Tanü putu nung jangratemtsü kaji, asenoki ochishia melinüyonga ochishia alitsüsa adoker, kechiyong computer technology ajanga asenok inyakyim nung kecha miimshia meyutetter. Iba jagi, asen lima nunga, akhidang ama tiyazü nisung tenüng nung ita sen agizüka mechitetter aser mapa meinyak ser tiyazü bill yanglua agitsü mesademi kümogo. Aji oda, kodang electoral roll nung aliba tenüngtem ya pei pei aadhaar number den sendaktepdir, idangjibo electoral roll nung nisung kasai tesem ka dak tali nung meinoktettsü. Tang yabo, Nagaland nung dang masü saka state ajak nung nisung aika pei tenüng electoral roll nung anaben asemben enoka lir. Atangji, item ajakji pei meteta asaa enokbabo masütsüa akok, kechiyong nisung ka tesem ka nung alidang electoral roll nung enokba sülen tanga tesem nung oa alir aser yangji ano tasensa züluker, anungji nisung kasa tenüngji electoral roll nung tesem aika nung angur. Ano, talisa asen lima nungbo pei alidak mesüra pei yimer vote aika sünüba agi kasa nisung tenüng tesem ana asem nung enoka electoral roll nung zülukodaktsür, anungji asenok nisung aika pei tenüng yimtaka lir aser town nunga lir aser ano pei telidakba tesem nunga mepu aser kiyong balala nung alitsüa akok. Item talila aser tiyazü vote enoka aliba ajanga election mapang tesem aika nung timtem lendong atalokba osang angashir. Asenok ya tiyazü jembitsü aser ochimashi mapa inyaksü yimya süba nungji, joko asenok meyong electoral roll nung nisung tenüng tim mesüi talila aika züluka ayuba toang temoatsü talila ka ama züngshir aser election mapang nung shitak pei tenüng electoral roll nung enoka alirtem to teimbaka, kar senyong aser kar government mapa yong ta yoker, tanüngba tiyazü 'proxy' vote-temji tesem kar nung tangatettep nung lemsar agütsür aser kar nungbo tashiyim amshia telok kati agiadoker. Iba amaji asenoki yimsüsürtem shimer. Ano külen, election nung toktepertemia pei taküm otsü dak aketba temetettsütem asüngdangba nung aikati ochishia melangzür. Iba jagi aiben election nung tokteper aser yimsüsürtem rongnung pei akaba rongsen aser pei azüngba degree indang ashishitepba angur. Itemji kodang bilemdangdir, election nung tokteper kati pei tenüng züludangyongi tiyazü jembitenzükra, election nung adoker yimsüsüa aodangbo pai mesüra lai kechikomaka ochishia yimsü sütettsü (?) ta bilemer. Tanü linük nung nübertem sensaker kata mali senso ajak pei poksüngbo ngua meraketa alitsüba ser nung nisung agi nisung memesük nübertem aika timtema lidaktsüba ya, linük nung nübertem peri rongsen makaba agi masü saka ketdangsertemi ochishia timi ketdang masüba ajanga lir. Item timtemji election nungi tenzüker, anungji election inyakyim merüktetbaji timtem poktetdak merüktetter asütsü. Yangi tamalen shisemba ama, tanü putu yabo putu tajung, kechiyong nisung melen kol tapu balala nem inyakdaktsüba putu, anungji nisung teri inyaksüba mapato nisung kati inyaker. Item mapa ajak nungji nisungi aibelena inyakra computer kol jagi taia, tiyazüa, shitak masüa ta putettsür, anungji aji shitak küma memetongshi tashi mapa meinyak anener. Aji oda, asenok tanü putu nung yabo asenoki ochimashi inyaknyonga kol jagi meinyakdaktsür, anungji asenok ajak ochishir kümadoker. Tanübo electoral roll nung asen tenüng aadhaar number den sendakteptsü indang jembir saka ano asüngbo asenok mapa bolua polling station bushia vote enoktsüi moi pei kidang nungi dang online nung vote agütsütsü. Aji oda, tang alima nung asen aliba ki aser tesem yabo khen toktsür, shibaibo ita petinutem nungi alimai vote enoktsüi alutsü? Itemji bilema asenok shisarenloka ochi tashiba aser tajungba akümtsü merangtsüba dak alaka, joko, asenok proxy vote agi senso candidate adokdaktsütsü merangtepba shisatsü tejen yabo endoktsü junger.

OLEMSABANG

CHRISTMAS TAYONGZÜKBA O

~ T. Lanu Jamir, Signal Dimapur.

(Saka kodang tabensa mapangji aru, tetsür ka agi asoba, aser ozüng kübok asoba oda Tsüngremi pei Chir yok. Galatia 4:4)

Yihova Tsüngremi meimchir temenen nungi alangzüksü aser tekümtet agütsütsü asoshi pei chir alimai yoktsü alemliyongi kotak nung renemadoker liasü. Iba miim oji (secret) mapang aser tensa balala nung Tanela Temeshi-i ajungshia ainkartem den jembir aser parnok nüburttem dang shina liasü. Aser iba ajaso chir, Yisu khristaji MIKA ainkaribo indang indanga, (Mika 5:2) Yihuda lima Bethlehem yimti nung asotsü ta shin. Aser ano iba Tsüngrem chir MESSIAH ji, tetemsü mapang ka nung alimai yoktsü ta renema liasü. Yisu alimai arudang "tetemsü mapangji komaka liasü tatsü agi rajemtsü merangdi.

Alima yimden aser terenlok tsütsülen nungi asadanga.

- (1) Yisu alimai arutsü mapang, kin ajak madak Roman Yimli-i meren merena yimsü süa liasü. Iba ya Tsüngremi renemba liasü. Roman yimli jagi Europe lima ajunga, Africa tesadang aser Asia tesadang ka nung yimsüsüa liasü. Aser iba Continent asem yongtsüji Yihuda lima liasü. Linük ajak den melamela senzütettsü aser osang sangtongtettsü, Roman Sorkar-i lenmang tajung sendaktepba yanglua liasü aser ashi- auür aser rakzükrakter kecha melidaktsük-i azüokteta ayu. Alimaji kija aser telok senzüsenbongtsü tesadem liasü. Itemya ajanga, Yisu khrista osangtajung ajaklen ayimsünga yoktettsü renemja ata.
- (2) Tsüngremi shimtetba, Greek yimli merena alidang, alima kin ajak oshi ka ajanga jembitettsü aser angateteptsü Greek arok oshi (common language) renema ata, Alima ajak nung Roman Sorkar-i yimsü süaka, oshibo Greek oshi jembia liasü. Yisu nütsüngtemi kodang Lai zülü, parnok Yihuda o nung masü Greek o agi zülü. Khrista osangtajung kin ajaki angatettsü aser zülutettsü, Tsüngremi renema ata.
- (3) Yisu khrista alimai arutsü mapang, alima nung shilu telemsa pezü (4) dang liasü. (1) Yihuda kin-i "Onok Abraham semchirtem, Tsüngremi shimtetba kin" ta, tanga kintemjibo shiruru ama dang bilem. (2) Roman Kin-i "Parnok ket nung meimchir ajak lir" ta majasüa bilem. (3) Greek kin-i, "Shisatsü tarok bushia züluba agi alima akoktsü ta bilem. (4) Temeyoktep kintem, tajemzük tia nung tanü ajung asaa alir nisungtem teimba liasü.

Tamangba yimsü tsütsülen nungi asadanga.

- (1) Greek nung 'DIANA' Tsüngrem külemba aser tesayuba nung taküm jakla tajungji majitet. Philosophertemi "Moral life" tesayuba tajung aika agüjaaka, yamaji parnok liteta mesayu nung nisungtem tamangba yimsü nung laktetadoker liasü. Yisu arutsü mapang nungbo, Ochi Tsüngrem ka, aginüba teyongyaba mapang ulura liasü.
- (2) Roman nung, Rom Chubatiba "CAESAR" ji külemtsü tenteta liaka aser külemaka, yangjia nisunger nüchi kümdaktsüba mangu, alar dang tali züina aküm.
- (3) Yihuda nung, Mosa Ozüngbenshirtem, ozüng agi meseper, tajung-tamajung mebendangteti mezüteper temeim samar liasü. Malaki ainketer sülenbo, joko küm 400 shi Tsüngrem nungi kecha tejembiba mali shisa ramar liasü. Iba den küm 400 mapang ozung tasen aika yanglulokba agi, takum libalirutsü kanga mesademi kümer liasü. Hau, alima nung tamangba yimsü jenti dang lir. Saka item tamangba yabo nisungi tsüngrem bushiba yimsüang, item yimsü akanga benshirtemi shi nungbo tazüokba angur aser senso tajung küma alitsü akoker saka panok menen tatok angutsü aser "Tanela Tekümtet" jenjang angutsü par tsüngremtem dak tashi aser ain mali. Ibai amajok tamang yimsü ta ashitsü asangsang. Saka khristan tamangba yimsü yabo, Tsüngremi nisung bushia arur pa dak amangtsü tesayuba yimsü lir. Temeshi Lai-i yamai ashir, Lenmang adangji, aser taküm ni, ni ajanga mesüra shingaa kü Bu dangi marur (John 14: 6) "Ano ashir, Tangar shingadaka Tekümtet mali, kechiaser asenok kechi nung kümzüksü tim, anungi sembanga aliba kübok nisung rongnung tangar tenüng kecha agüja mali". (T/Mapa 4:12) Tasotsü kinü tanurji Yosef o Marir kibong nung dang masü, asenok ajak kibong nung sodaktsüdi aser pa Chubadaktsüdi. Shibai pa agizüker aser pa o benshir, tepela aser tesünep taküm, arishi talang moatsütsü aser süngjang tajung adokdaktsütsü. Ano sür-a, Tanela tekümtet angutsü.

Tayongzükba o ka.

Tir yimyim nung zülur ajak dang, ni tayongzükba o ka yamai shinür. Asen tsürabur Nokdenlemba, Bible translator ABAM nung inyakdang Ao o nung temesüktep o aika alinung, kanga dang shisakaa, iba ojang/item o yabo, olabo kasa adoktsü akok saka zülumenbo yamai dang südi ta arrla (universal truth) mapangshia agütsür 1964 nung Temeshi Lai sayaogo. Saka itemji kecha süksüshia meli-i dang tanü tashi züluteper tesasatsüka! Tatishitsü kar yamai, mim (poison), miim (secret), tebur (male), tobur tajung (beauty), amang (believe), amang (dark), ne (your), nü (spear), nü (yam), nütsüng-nübur (people), aier (a clan), aiür (young girl), auür (thief), aten (sing), aden (attend) etc etc etc.. Iba den zülumen (spelling) tali tajungba nung asüngteta akümtsü atema Ao sensotemi bangdak agüja shimtet aliba ASLBI 2019 nung Arok osep kakat adokogo. Ni tetzütetba agi, 3% shikaang melenshitettsü südi ta bilemer. Pai zülua toktsüba ya sayatonya tsüka! Dr.Clark "Ao Naga Dictionary" 1911 nung zülua toktsür taküm, küm 110 ajunger. Saka tanü tashi, asenoki tesayuba (tetuyuba tajung liaka, pei pei-i mulunglen dang züluteper (self style) ya kanga dang tashi manga aser tesasatsü mapa ka lir. Iba wadang nung metitemi/ tanen makai nongitsüba telokji, Arogo nung toklang tenzükertem lir. Nenok tangar oshi nungbo, tazüngba tululu ngur alirtesa, yamaji par oshi nung zülubabo shitak züluteter kanga junger. Nenoki anogoshi Lai azünger, zülur, jembir aser kena atener, oda, Laishiba aser ken kakatji nenok atemabo, "pong dang o temekütsü (cork)/ chitem o aontem na mepila amai lir. kakattemji tamentakdaksür, tataloktsürtemji nenok asütsüla. Nisung kati otsübo tajung ka zülur, zülumen meshitakra, "Imtongjungba, kidangbo "Kilongraba" mesük, otsüa tajung, zülumena shitaksüra, Imtongjungba, kidanga kilongjungba ta aja amai asütsü. Kechibasüra, shibai kechi züludir, otsü dang nungi, zülumen shitak züluba jagiang pa/la temetetba aser tangatetba shisanger. Joko tang nungibo asenok ajak khen saksalemdi aser kakattemji kam sür, zülumen shitak amshia züludi aser mongyin (Literati) akümtsü merangdi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

BSI Dimapur Auxiliary-i BSIKB indang magazine sayatsüogo



Kohima, December 16 (TYO): December 11, 2021 nü Calvary Baptist Church, Jotsoma nung Bible Society of India Dimapur Auxiliary Tir, Rev. Dr. Paphino-i Bible Society of India Kohima Branch (BSIKB) indang mezüngbuba triennial magazine sayatsüogo, ta BSIKB Triennial Magazine Committee Convenor, Surjay B Sapkota-i sangdong ka ajanga metetdaksü.

Bible Society of India,

Dimapur Auxiliary indang branch 48 lir aser item branch rongnungi tesüiba küm asem tashi senotsü timba agütsürji BSIKB lir, ta BSIKB Triennial Magazine Committee Convenor aser Pastor, Surjay B Sapkota-i metetdaksü.

Paisa, Kohima nung aliba Arogotem aser BSI Central Office Bangalore, BSI Auxiliaries, Church Associations/Councils den tanga organizations balala nem tekaraba nung iba magazine

angati agütsütsü, ta metetdaksü.

Kohima nung iba magazine copy shia sen 100 agi ayoktsü atema Arogotem nem agütsütsü, anungji Triennial Magazine Convener Pastor Surjay B Sapkota den phone number 9436601097/7005336877 ajanga mesüra BSI Kohima Branch Tir, Those Kraho den phone number 9436001479/8974009924 ajanga tongteprateptsü akok, ta paisa metetdaksü.

Gujarat nung police-i Missionaries of Charity anema bushisüngdang

Luchii/December 16, 2021: Police-i Gujarat state nung aliba Missionaries of Charity indang orphanage anema bushisüngdangdar, ta aser ibaji Kolkata nung Mother Teresa-i tenzükba Missionaries of Charity tenüng menüksütsü nükjidong nung inyaker asütsüa akok, ta Arogo lenirtemi bilemer.

Sorkar ketdangser kati anti-conversion ozüng nung ajemdaker ken o ka agütsüba sülen December 13 nü Gujarat kübok Vadodara yimti nung police-i Nirmala Shishu Bhavan shelter home bushisüngdanga liasü.

Baroda nung aliba Arogo nung ketdangser aser Jesuit putir, Stanislaus Fernandes-i, police-i inyakba mapa ya onok rejutem tenüng menüksütsü atema lir, ta ashi.

Tesüiba küm aika iba shelter home nung lajartem yaria aruba atema social welfare ketdangsertemi tenüngsang agüja aruogo, ta paisa metetdaksü.

Iba dak sendakba nung pai Khristantem dang nun tem aser par Arogo atema sarasademjang, ta mepishia metetdaksüogo.

Arogo lenirtemisa, India linük tesem balala nung Khristantemi achayangba rejutem dak tenük yoka inyakba ama tang iba shelter home anema-a inyaker, ta

metetdaksü.

Shelter homes mesüra orphanages anema yazü jembiba ajanga nüburtem nem temelung melemdaksütsü, talisa secular Hindu nungertem nem temelung melemdaksütsü nükjidong nung parnoki Khristantem anema inyaker, ta Fernandes-isa metetdaksü.

2014 küm Centre nung BJP-i aniba NDA-i sorkar akümba sülen nungi state sorkar aikati anti-conversion ozüngtem agizüka Khristantem anema inyaker, ta Arogo lenirtemi metetdaksü.

Tang shelter home anema bushisüngdanga ya alima nung kanga nüngtugu Missionaries of Charity tenüng menüksütsü nükjidong nung inyaker. India nung kanga nüngtugu, asür Mother Teresa-i talisa s h i r a n g e r t e m , matamabensartem aser lajartem yaria liasü, ta Gujarat nung meimchir temeden atema inyaker, putir Cedric Prakash-i ashi.

Missionaries of Charity ya 1950 küm Mother Teresa-i Kolkata yimti nung tenteta liasü aser tangbo alima tesem balala nung Missionaries of Charity nungi nun 5,000-i shelter homes/orphanage 750 dak tema nung timtemertem aser lajartem yarir. India kija nunga item ama homes aser orphanage 243 lir.

Putir Prakash-isa, sorkar

ketdangsertem aser Hindu right-wing teloktemi Missionaries of Charity anema inyakyonga item ama homes nung teyari angurtem timbaka Hindu nungertem lir, ta parnoki jungjunga meteta lir, ta metetdaksü.

"Shelter homes mesüra orphanages anema yazü jembiba ajanga nüburtem nem temelung melemdaksütsü, talisa Khristantemi inyakba mapa tajung inyakba pelaa agizüker secular Hindu nungertem nem temelung melemdaksütsü nükjidong nung parnoki Khristantem anema inyaker," ta Fernandes-i metetdaksü.

2018 küm Ministry of Women and Child Development-i Missionaries of Charity-i achayangba childcare homes ajak mita oa liasü. Ozüng alema orphanage nung alir tanurtem 'adopt' südaksür, ta tai tongloktsüba nung ajemdaker sorkar ketdangsertemi shelter homes aser orphanage ajak mita oa liasü.

Ano külen bendanglen nungi Jharkhand state nung Missionaries of Charity dangi senotsü teyari yokba maparen nung temelung melemi bushisüngdanga liasü. Nun temi bendanglen nungi aruba senotsüji tanga maparen atema amshir, ta tai tonglokja liasü.

ANOGO ABEN TSÜNGREM DEN

Tsüngremer mapa nung shilem asenek

"Nenoki kechisa inyakdir aji nisung dang masü, saka Kibuba dang temulung ajak agi inyakang." Kolosi 3:24

Kodang nisung aika sentepa aliba telok nung shilem agitsü südir, agiri nübur temoatsü angutsü asoshi tajungtiba asütsü meranger. Tapet shsiatsü aser kentenmenü tetangshi lemsateptsü meranger. Tajungtiba aser takok asoshi kaketshirtemi temulung agüja azünger shishilembartemi junga yoktetsü meranger, aluyimertemi alu mapa meranga inyaker.

Pei jurila, Arogo, lokti mesüra sorkar mapa ajak nung kasa temulung agüja ochishia inyaktsü kanga tongtibang. Aibelenaka nisung tsüngdang melamela miimbanga yutettsü akok saka Tsüngrem tsüngdang kecha miima ayutsü makok. Asen Tsüngremi ajak angur aser asadanger aser kenü anogo obendangtsü anungji kechisa südir Tsüngrem mamai inyakdi.

SARASADEM:

Kü Tsüngrem, mapa inyakba ajak, na asoshi inyaker ta bilemtetdakjangma. Amen
Laishiba küm ka nung: Isaia 3-6, J Adok4, T Ken 93

France nung kiralongrartemi Khristantem amaktsü aliba nokdangtet

December 16, 2021: France December ita nunga yimtiba, Paris nung Khristmas kiralongrartemi Strasbourg yimti mapang nung Khristantem nung aliba Khristmas market ka amaktsü sentong aliba amakdang nisung pongu asü nokdangtetogo, aser iba dak aser 11 yirua liasü.

Yaküm October ita nunga Tunisia nung kiralongrar, Brahim Aioussaoi-i Nice nung aliba Notre Dame Tenla kidang Khristantem amakdang nisung asem asü aser kar yiruja liasü.

2016 küm July ita nunga France kübok Nice nungsa kiralongrar, Mohamed Bouhlel-i truck gari kati nisung 84 tsükset aser noklang aika yiruja liasü.

Tenapronglaji arrshi küm 23 dang lir aser tenati shopping centers, universities aser lenmangtem nung nisung aika tepsettsü tebilemba liasü.

December 3 nü General Directorate of Internal Security-i tena apu aser iba osangji French Interior Minister, Gérald Darmanin-i social media ajanga metetdaksü.

"Tena tsüngda online ajanga tongtepratepba onoki jangjaogo, aser ibaji ajanga tena asalentongji tamajung asütsü ta onoki melung melemi liasü," ta ketdangsertemi metetdaksü.

Taküm küm kija nunga France nung police-i kiralongrartemi civilian amaktsü sentong aliba pezüben tashi nokdangtetogo.

Tesüiba küm ishika France nung Islamic kiralongrartemi tesem balala amaker. 2018 küm

Yaküm July ita nung Observatory on Intolerance & Discrimination Against Christians in Europe-i, tesüiba küm 10 tsüngda France nung Khristantem anema inyakba shilem 285 agi timba kümogo, ta metetdakja liasü.

OLONG PAITEP # 6029

1		2			3		4			5
				6		7				
8										
						9				
			10							
11										12
					13			14		
15										
16										17

TIPIEN		LANGTSÜNGLEN	
1. Nüji masü	- (4)	1. Jila tulu	- (5)
3. Technütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

OLONG PAITEP # 6028 TELANGZÜBA

TIPIEN :		LANGTSÜNGLEN :	
1. Tesangra, 5. Mungo, 7. Kisen,		1. Temesen, 2. Raksa, 3. Aon, 4. Aso,	
8. Salem, 12. Semki, 14. Kilem,		6. Nile, 9. Alizüng, 10. Omen,	
15. Kensü, 16. Sangpang.		11. Lemta, 13. Ola, 14. Kin.	



ALOKBA SUPER MARKET NUNG :
Künü anogo Alokba super market nung kinungtsü Warakla Samar bushidang aiür tebour tajung ka anasai or ashir.

Alokba : Nabo kü den khen sensaksema nokdakang ni?
Aiürla : Kechi nüngdak ni nü den jembia nokdaktsüba?
Alokba : Ni kübotsü samar bushirba, saka kodang ni tebour tajung aiür kar den jembia nokdakdir kong nungiar ka la aruadoker, aji agi ni khen yariangma.

Lilir : WhatsApp

TANÜBO NAI LANGZÜANG

Q. State koba nung Covidengue (COVID-19 aser Dengue temeyoktep) putet?
 [A] Kerala [B] Telangana
 [C] Madhya Pradesh [D] Gujarat

(Taruba adok nung onoki langzüsü)

YASHI ADOK TELANGZÜBA : West Bengal

AO OSHI ANGAZÜKDAK:

TANÜ ANGAZÜKTSÜBA OJANG



Liten
 (n) nisung alitsü atema arem lepboka akümba tesem (New settlement in virgin forest)
 * Nokinketertemi **liten** mesemteta yim akümer.

Litentu
 (v) arju kima aser temeküt merükteta amungba (cleaning of boys dormitory and its surrounding)
 * Moatsü jakdang arju nunger **litentu** inyaka amonger.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA

DECEMBER 17 NÜ ASOR TONGTIBANG NISUNG KAR:

- English writer Ford Madox Ford (1873)
- Pope Francis (Jorge Mario Bergoglio) (1936)
- British singer/actor Tommy Steele (1936)
- Blues musician Paul Butterfield (1942)
- Nigeria President Muhammadu Buhari (1942)
- Actor Ernie Hudson (1945)
- Comedian Eugene Levy (1946)
- British rock singer Paul Rodgers (1949)
- Actor Bill Pullman (1953)
- MMA fighter Chuck Liddell (1969)
- Indian film actor/producer/model, John Abraham (1972)
- Indian film Director, Neeraj Pandey (1973)
- Actor Sarah Paulson (1974)
- Actor Milla Jovovich (1975)
- Actor Riteish Deshmukh (1978)
- Boxer/politician/entertainer Manny Pacquiao (1978)

SUDOKU # 6069

TELANGZUBA # 6068

	5		4	3				1	7	4	9	6	2	5	3	8	
1		4	8	6			2	9	6	2	8	3	5	1	7	4	
	3					4	8	5	8	3	4	1	7	9	6	2	
4		2		5	8			3	1	7	5	2	8	4	9	6	
5			3	9		4	8	6	4	5	6	1	7	9	2	8	3
6		3			4	2		5	8	2	9	3	4	6	7	5	1
	6		7	2	1			2	3	8	7	5	1	6	4	9	
7	2	9		4	3			6	4	5	2	9	3	8	1	7	
	4		9	8		5	7	7	9	1	6	8	4	3	2	5	

OJANG LUTEP # 5615


HOCI :
 HISÜSA :
 ESÜMRA :
 ZÜTIYA :
 PARMAEN :
 AKAJ :
 NÜKE :
 OGOANBO :
 GKAJUNI :
 KTADOSÜ :

OJANG LUTEP TELANGZÜBA # 5614

TAKÜM KHRISTMAS MAPANG ITASEN MANGUBA YAGI KIBONG AIKA TIMTEMTAR ASÜTSÜ

TAN HOPTA ATEMA - KOMA SÜLA ?

Q. Nagaland nung India sepaitem ya melidaktsü nunga koma süla ?



December 16, 2021 nü 'Vijay Diwas' anogomong nung Chennai nung aliba War Memorial nung National Cadet Corps (NCC)-i taküm tenla agüja asür sepaitem nem akhüm agütsüba noksa nung angur.

Opposition-i Ajay Mishra minister menden nungi anentsütsü akhanger

New Delhi, Luchi/December 16 (Agencies): Brihostibarnüa Rajya Sabha nung Lakhimpur Kheri tatalokba nung ajemdaker senden thina liasü.

Nikongdang 2:00 ako nung Rajya Sabha senden tanaben tenzüka sülen opposition-i Lakhimpur Kheri tatalokba nung ajemdaker Minister of State from Home, Ajay Mishra Teni minister menden nungi anentsütsüla, ta takhangba agütsü.

Uttar Pradesh kübok Lakhimpur Kheri nung aluyimertem gari agi menüngsetba nung Minister of State, Mishra'er jabaso Ashish Mishra-ia shilem agia lir, anungji Ajay Mishra minister menden nungi anentsütsüla, ta opposition-i akhanger.

Rajya Sabha nung opposition lenirtemi sabangleni oa longkak ait. Parnoki "MoS Home anentsütsüla" aser "Amit Shah'er MoS-i anentsüla" ta zülur longkak ait.

December 15 nü GK Vasan-

i benokba nung ajemdaker Deputy Chairman, Harivansh Narayan Singh-i Omicron variant tensa atema o lemtepsü melaba sülen Congress, DMK, RJD, AAP, NCP, Left aser Shiv Sena nungi MP temi yimiyim ayima liasü.

Yashia Omicron variant onük nung o lemtepa liasü saka opposition lenirtemi timtem agütsüba ajanga iba onük tembanga mejembitet.

Deputy Chairman-i opposition dang senden akhümket wazüka ayutsü aser o lemtepa nung shilem agitsü atema mepishi, saka opposition-i tashi mangaba ajanga pai Hokolbar anüngdang 11:00 ako tashi senden thinen.

Opposition-i Minister of State, Ajay Mishra Union Cabinet nungi anentsütsüla, ta takhangba agüja longkak aitiba ajanga Brihostibarnep Rajya Sabha aser Lok Sabha naprongla nikongdang 2:00 ako tashi sendena liasü.

Anogo ishika tejaklen

Special Investigation Team report ajanga, October 3 nü Lakhimpur Kheri nung aluyimertem tepsetbaji aibelena masü saka jelia asalentong yanglur tepsetba lir, ta metetdaksüba sülen opposition-i tang ola tuluba adoker.

Ashish Mishra-i aniba SUV gari agi aluyimertem menüngset, aser iba ya nisung tepsettsü nükjidong nung inyakba lir, ta report nung shia lir.

SIT-isa, gari mashie aniba atema Ashish Mishra anema ken o benoktsüla aser nisung tepsettsü merangba aser yirutsüba dak sendakba arlatem nung parnok aitsütsüla, ta metetdaksü.

Lakhimpur Kheri tataloka ya Special Investigation Team (SIT)-i bushisüngdang aser parnoki agütsüba report nung ajemdaker Bodhbarnüa Congress-i Ashish densema tang pua alir nisung 13-i nisung tepsettsü merang, ta ken o benoktsüla, ta takhangba agütsüogo.

Tanü PM Modi-i All India Mayors conference tenzüksütsü

New Delhi, December 16 (Agencies): Hokolbarnü Ato kilonser, Narendra Modi-i video conferencing ajanga Varanasi nung All India Mayors' Conference tenzüksütsü.

PMO sangdong ajanga, state balala nungi mayor temi iba conference nung shilem agitsü; taküm iba conference omenji

"New Urban India" lir, ta metetdaksü.

Jila/yimitem nung terenlok mapatem inyaksü aser nüburtem atema nüngdak balala reprangteta inyaksütsü atema Centre sorkari schemes aser maparen aika tenzüka inyakdar, ta kasa sangdong nung shia lir.

Talisa Uttar Pradesh nung

schemes aika tenzüksüba ajanga tesüiba küm pongu tsünga jilatem kanga renlokogo, ta PMO sangdong nung shia lir.

India sorkar aser Uttar Pradesh sorkar nati jilatem nung lenla ajak tsütsü terenlok aliba sayatsü atema December 17 nungi exhibition alitsü.

Chief of Staff Committee Chairman tasenbaji Gen. MM Naravane asütsü

New Delhi, December 16 (Agencies): Chiefs of Staff Committee nung Chairman, General Bipin Rawat süadokba ajanga iba menden atema Chief of Army Staff, General MM Naravane shimogo.

December 08, 2021 nü Tamil Nadu kübok Coonoor district anasa IAF indang chopper tsükokba lendong nung Chief of Defence Staff (CDS), Gen Bipin Rawat asüba ajanga CSC Chairman menden tazüng aküm, aser iba menden atema Naravane shimmer.

Iba committee nung chairman atema Gen Naravane shimogo, kechiyong service asem nungi tongtitem rongnung pa senior-most lir, ta ketdangsertemi metetdaksü.

September 30 nü IAF Chief, Air Chief Marshal VR Chaudhari shima liasü aser November 30 nü Navy Chief, Admiral R Hari Kumar shima liasü.

Chief of Defence Staff

(CDS) menden malidang Chiefs of Staff Committee chairman atema service asem nungi senior-most iba menden asoshi shima liasü.

Mongolbarnü Chiefs of Staff Committee (CoSC) senden amen aser iba mapang nungji parnoki tawa chooper tsükokba lendong nung asürtem- General Bipin Rawat aser pa kinüngtsü na densema asür 13 nem akhüm agüja liasü.

Chopper tsükokba lendong nung Group Captain Varun Singh dang kümzüka saka pa-a Bengaluru nung aliba military hospital ka nung treatment tagidak mapang Bodhbarnü süogo.

Ano külen tanga osang ka ajanga ashiba agi, General Naravane-i phone ajanga Royal Saudi Armed Forces nung Commander, Lt Gen Fahd bin Abdullah Al-Mutair den linük ana tsünga defence tsütsü amalitepa inyaksü atema jembiogo.



December 16, 2021 nü Yelahanka Air Force station, Bengaluru nung Group Captain, asür Varun Singh nem pa kinüngtsü, Uma Singh aser jala Geetanajali Singh o Aradhya Singh nungeri asür nem tatebangbuba akhüm agütsüba noksa nung angur. Tawa Tamil Nadu nung IAF chopper ka tsükokba lendong nung pa dang kümzüka liasü saka hospital nung treatment tagidak mapang yashi (December 15) asü.

Oxygen agi anüngba agi state nung shiranger kata masü: UP sorkar

Lucknow, Luchii/December 16 (Agencies): Brihostibarnü Uttar Pradesh sorkari Legislative council dang, coronavirus wave tanaben prokba mapang nung state nung oxygen agi anüngba agi shinga masü, ta metetdaksü.

State sorkarisa, iba tashidak agi shiranger 22,915 süogo aser parnok asüba certificates nung 'oxygen agi anüngba agi asü' ta zülua mali, ta metetdaksü.

Question Hour mapang Congress Party nungi MLA, Deepak Singh-i asüngdangba langzüdang state health minister, Jai Pratap Singh-i, "Iba wara tanabenbuba prokdang state nung oxygen agi anüngba agi shinga masü," ta metetdaksü.

Deepak-i, minister kari ashiba ama oxygen agi anüngba agi nisung karbo asü asü? ta asüngdanga liasü.

Assembly senden nung Congress MLA-i, "Minister

aikati shidi ajanga, state nung oxygen agi anüngba agi nisung aika südar ta metetdakja liasü. Iba dak alia MP tem-a aikati kasaji shiogo. State tesem balala nung oxygen agi anüngba agi asüba osang sorkar ket nung ali asü? Ganga ayong nung tasümgangtem apongdeka aliba aser oxygen agi anüngba agi nsiungtem timtemba sorkari ngur asü?" ta asüngdanga liasü.

Ibaji langzüa minister, Pratap-i, hospital nung amonger ka süadokra doctor temi nisung asüba certificates agütsür, aser nisung 22,915 asüba certificates nungji 'oxygen agi anüngba agi asü' ta ka nung danga shia mali, ta metetdaksü.

Minister-isa, wara mapang asürtem aika tanga tashidak balala agi asü aser oxygen agi anüngba mapang nung sorkari tanga states nungi oxygen anepalua bener arua liasü, ta metetdaksü.

(Maneni tapak 10 nung...)



New Delhi, December 16, 2021: 1971 küm India-Pakistan rara nung India-i takok anguba sülen taküm küm 50 ajungba nüngtem nung Brihostibarnü New Delhi nung Defence Minister, Rajnath Singh-i India Post special day cover aser commemorative stamp sayatsüba noksa nung angur.



Law enforcement partnership tasen ka tenzüksü atema Washington nung aliba US Department of Justice nung Attorney General Merrick Garland den senden ka agidang Australian Minister for Home Affairs Karen Andrews-i jembiba noksa nung angur. Linük anaprong nung nüburtum kumzuka ayuba nung tashi itshitsü nükjidong nung United States aser Australia tsungta tezüngzüktep ka agia liasü.

Dominican Republic tayimtsü tsükokdak nisung 9 asü

Santo Domingo, Luchii/Dec. 16 (Agencies): Dominican Republic kübok Santo Domingo nung jurila meyong tayimtsü ka tsükoka yangji mena alir nisung tuko prong asü, ta airlines aser yangji aliba osangbener temi ashi.

Bodhbarnü lendong nung asürtem rongnung Puerto Rican music producer Jose Angel Hernandez dena liasü, shiba dang Flow La Movie ta ajar.

Helidosa Aviation Group ajanga par indang Twitter account nung ashiba agi, Gulfstream jet nungya tayimtsü ketdangsür ana aser passenger tenet mener El Higuero airport nung Miami bushia ayameso aser mapang tatsüka lir Santo

Domingo nung aliba Las Americas International Airport nung anentsü bushia liasü.

"Iba lendong ajanga temolung shiranger aser jashir," ta company ajanga ashi.

Iba tayimtsü lendong ajuruba mesüra tayimtsü aniri ajungbena anentsü merangba atema kuli kecha agüja mali.

Iba lendong atalokba sülen airport ajanga inyakyim ajak anena tayimtsü noklang dak tema athi.

Yangji aliba osangbener temi ashiba agi, Hernandez tetong aser par jabaso dena asü aser ano asürtem ya ka arishi küm pezü aser ka 13 lir, ta ashi.

Hernandez den kinunger aser külemi inyaker nisung trok

liasü, ta Helidosa Aviation ajanga ashi.

Parnok ya Debbie Von Marie Jimenez Garcia, Keilyan Hernandez, Hayden Hernandez, Yeilianys Jeishlimar Melendez Jimenez aser Jesiel Yabdiel Silva, ta jangjaogo. Tayimtsü ketdangsür ya Luis Alberto Eljuri aser Víctor Emilio Herrera liasü.

Arishi küm 38 tain Hernandez-i Te Boté, Bad Bunny, aser Ozuna ama Urban Latin ken tem yanglua liasü. Paise La Jeepeta by Nio Garcia, Brray and Juanka, aser Wow Remix yanglua liasü, kong kentener Bryant Myers, Arcangel, Nicky Jam, El Alfa aser Darell nungertemi shilem agia liasü.

Super typhoon Rai: Philippines nung nisung aika jena aor

Manila, Luchii/Dec. 16 (Agencies): Super typhoon Rai ajanga southern Philippines nung kongshia tzümetsüng adoka ki-o-jen raksatsütsü sangdongba sülen nisung meyerijang aika pei ki yutsür jena aor.

Iba yipru ya tourist tem asoshi nungtugu asetkong, Siargao nung kongshi aser iba mapang mopung ya ghonda ka nung kilometre 175 shi kera ona liasü.

Siargao tesem aika nung power aser communication mali aser iba yipru yagi nisung million 13 dak kongshitsü akok, ta UN-

i ashir.

Yipru tesashi arutsü tetsübu nung tayimtsü athi aser rong anenba tesemtem shibanga liasü.

Taküm South-East Asia linük nung typhoon tem agi kongshiba rongnung Rai ya tesashitiba alitsü.

"Khu abenba train ama iba yipru tesashi yagi tzükumlen aliba tesemtem nung kongshitsü sayur," ta International Federation of the Red Cross (IFRC) nungi Alberto Bocanegra-i ashi.

Social media nung video tem prokshiba nung Philippines

Coast Guard temi tzükumlen aliba nüburtum yaritepa pei kidang nungi anizüker aoba nguogo.

Tang tashibo asü-amaba mesüra yiruba osang mali, ta ketdangsürtemi ashir.

Philippines nung yipru tesashi ya teti arur aser küm nung yipru aser typhoon 20 shi agi kongshir.

2020 küm November ita Super typhoon Goni ajanga nisung aika takum samatsü aser ki-o-jen raksaja liasü. 2013 küm Typhoon Haiyan agi nisung 6,000 dak tema tepsetba sülen iba yipru ya tesashitiba liasü.



Manila, Dec. 15 : Pasay City, Philippines nung aliba mall ka telung nung cinema hall ka vaccination centre akumba sülen December 16, 2021 nü nüburtum COVID-19 vaccine agitsü atatepa aliba noksa nung angur. Philippines nunga Nigeria aser Japan nungi arur nisung ana dak coronavirus Omicron variant jangjatetogo, ta Department of Health (DOH) ajanga Bodhbarnü ashi.

2021 küm osangbener 488 tepuokdak ayu, 46 tepset

Luchii/December 16, 2021 (Agencies): Tang alima nung media nung inyaker nisung 488 tang tepuokdak yua lir, aser ibai küm 25 dak tema nungi Reporters Without Borders ajanga züngdanga aruba nung timtiba alitsü, ta iba NGO yagi Brehostibarnü sangdonga liasü.

Parnoki küm shia iba ama osang sangdong tenzükter taküm osangbener ishiba - 46 - tepseta liasü, aser ibaji talisa Middle East nung rara ajema akumba ajanga lir.

"RSF ajanga 1995 nungi tenzuka küm shia osang sangdong tenzükter pei mapa dak sendakba nung osangbener tem pua aliba ya kodanga iba amai meliasü," ta NGO ajanga sangdong ka nung ashi, shirnoki osangbener temeden asoshi tongpang balala rarar.

Tesüba küm dang nungi shilem 20 shi agi timba alitsü, aser ibai talisa Myanmar, Belarus aser Hong Kong nung media anema inyakba ajanga lir. Osangbener tetsürtem tang pua aliba ama kodanga meliasü, aser 2020 dang shilem asem agi timba lir. Tang tetsür 60 tepuokdak tesem balala nung yua lir.

Osangbener tepuokdak ayuba ya China nung timba lir, kong nisung 127 tepuokdak lir aser ibai talisa Hong Kong nung national security law benokba ajanga alitsü.

Myanmar (53) tanabuba jenjang nung lir, iba sülen Vietnam (43) aser Saudi Arabia

(31). Syria, Iraq aser Yemen nung 2016 küm sülen osangbener asüba ajema akumba ajanga rara ajema akumba sayur.

Nisung 46 tepsetba ya shilem 65 shi tenük yoker samatsütsü merangba nung asüba lir, ta report ajanga ashi.

Lendong aliba linük tamajungtibaji ano maneni Mexico aser Afghanistan ya lir, kong osangbener tenet aser trok tepset, iba sülen Yemen aser India nung pezü-zü asü.

Alima nung osangbener aser külemi inyaker 65 pua ayuba indang RSF ajanga ashi. Parnok ajak ya Middle East nung - Syria (44), Iraq (11) aser Yemen (9) - lir aser France nung osangbener Olivier Dubois ya Mali nung April ita nungi pua yua lir.

Tashiyim amshiba putu ka nung media freedoms kumzuka ayutsü mechi taoba ita The Hague nung osangbener tepsetba asoshi obendang agütsütsü atema "people's tribunal" ka lapoka liasü.

Iba ya press freedom organisation temi amenokba lir, aser ita trok ken o jembiba nung Mexico, Sri Lanka aser Syria nung osangbener asem tepsetba ken o kakteta jembitsü.

Parnok dak nisung aitsütsü tashi mali, saka awareness agüja sorkar ajungmesotsü aser kuli bendentsü.

Iba tentet ya Free Press Unlimited (FPU), the Committee to Protect Journalists (CPJ), aser Reporters Without Borders ajanga ayongzükba alitsü.

Australia 'bouncy castle' lendong nung tanur aika asü

Devonport, Luchii/Dec. 16 (Agencies): Australia nung 'bouncy castle' ka mopung agi oner aoba nungi tsüka tanur pungo asü aser pezü yiru, ta police temi ashi.

Devonport, Tasmania nung primary school fun day ka nung Brehostibarnü iba lendong ya mopung aonba ajanga ajurua liasü. Tanurtem ya azüklen meter 10 (feet 32) nungi tsük aser iba lendong ajurur alirtem rongnung tetsür aser tebur lir, ta police temi ashi.

Ketdangsürtemi parnok arishi küm mashi saka parnok ajak ya grade pungo mesüra trok nung azünger lir ta ashi, anungji tanurtem ya arishi küm 10 nungi 12 tsungta alitsü.

"Mopung aonba ajanga tanurtem pongzua/jokzua kazüba castle aser mopung inoka aliba ball tem anüngleni ajungket," ta Tasmanian Police Commissioner Darren Hine-i ashi. "Tanurtem yamai kera asüba atema mang yima aliba kinunger, school nung külemi azünger aser tesayurtem den onok lir."

Australia Ato Kilonser Scott Morrison-i iba lendong ya bilemstsü makokba temolung raksa ka lir, ta ashi.

"Tanurtem pelatepa kazütsü ao... aser ibaji lendong ang akum. Iba mapang temolung raksar," ta pai ashi.

Iba lendong ya Bodhbarnep 10:00 ako (par mapang) meta atalokba sülen paramedics tem

kanga kera Hillcrest Primary School bushia aru.

Tanurtem nem first aid agütsüba sülen helicopter tem nung anir mozü kidangi ao. Mezüng tanur pezü tsüka asü aser ka mozü kidang asü.

School tembangba anogo iba lendong ya ataloka liasü aser lendong atalokli tsürabur nem osang agütsü.

Tsüraburtem pei tanur bushia asemtepa school kidangi ao, ta ABC osangbener Monte Bovilli ashi. Tsürabur kati yangji aliba osang kaket ka den jembiba mapang, taoba mapanga school nung iba amala ya inoka liasü saka timtem kecha ajurua meliasü, ta ashi.

"Pelatepa amungba anogo ka yamai tembangtsü tebilema mebilem," ta lai Hobart Mercury dang ashi. "Iba lendong ajurua aliba tsürabur asoshi onok ajak temolung shiranger. Aser onok chirtem meyeruba asoshia aibelen kar inyak amai bilemer."

Police temi iba lendong atalokba indang bushisüngdang tenzükogo, ta ashi.

Tasmania north tsütsü tzükum nung aliba Devonport yimti nungya nisung 30,000 majung alir. Taoba mapanga iba ama lendong ya ataloka liasü. 2019 küm China nung kasa lendong ya ajurua tanur ana asü aser 20 yirua liasü.

Küm ka jakdang UK nunga bouncy castle ka nungi tetsürchanu ka tsüka asü.

ALIAYOKER

Dimapur nung Old Showba aser New Showba na tsünga, 4 lane lenmang anasa (2nd & 3rd plot), ali bigha 11 tayoktsü lir. Talirner nem pei aginüba tasazük square feet nung sen Rs.150 agi ayoktsü. **Tongtepratepdak – 90896 69298.**

DC Office Kohima-i Khristmas jeli sentong ayongzük

Kohima, Luchii/December 16, 2021 (TYO): Brehostibarnü, Deputy Commissioner Office, Kohima ajanga DC indang farm site, Kohima nung Khristmas jeli sentong ayongzük, kong Department balala nungi ketdangsürtem iba sentong nung dena liasü, ta sangdong ajanga metetdaksü.

DC Kohima Gregory Thejawelie, NCS-i, 'tanü tashi asenok yamai len ania aser iba jenjang tongtetdaksüba atema Tsüngrem tenüing asanger,' ta metetdaksü aser Tsüngremi asenok dang taochi mesayu asüba asenoki tanü iba anogo memungtetla; alima ajunga asünga wara (Covid-19) liaka, tanü Tsüngrem taochi nung tensa tajungba küma asenok longjemer iba anogo amungtsü asoshi mapang agi sempettsüogo, ta telok den lemsatap.

DC-i, Khristmas mapang

medemer aser tangar dang asenoki temeim mapa sayur, iba den külemi sarasadem, tekülem mapang tajung ayongzük aser carol agiba dak alia telok chiyongba benjung balala agir. Tangar den pelatepa aser aser temeim lemsatap yongjia, asenoki tamasa chichiba Khristmas tetezü aser Khrista asoba jung junga angatetsüla, ta ashi.

Tamanger ajaki pei taküm aser tanela Tsüngrem nem bendanga agütsütsüla aser pa teyari meshitsüla; aser asen menen yong Tsüngremi tematiba tenla agütsüba asoshi asenok pelatsüla, ta pai ashi.

Maneni, iba sentong nung SDO (C) Office Zubza aser Jakhama nati ken ka aten. Iba sentong nung SDO (C) R. Daniel Angami menden liasü aser iba benjungmung tembanga gift exchange den asayamenü sentong tem achaayanga agi, ta kasa sangdong nung shia lir.

Assam Rifles-i NE nung Christmas star tulutiba yanglu

Aizawl, December 16, 2021 (Agencies): Nagaland nung Indian security forces-i civilian tepsetba anema jashitepba mapang ka nung Mizoram nung Assam Rifles-i Christmas jakdang Christmas star tuluka yangluogo.

Süklep 47 talang Christmas star ya Northeast nung tulutiba lir ta ketdangsürtemi ashi.

Mizoram kübok Lunglei nung 23 Sector Assam Rifles-i "Christmas Star" tulu ka yangluogo, ta Assam Rifles ketdangsür kati ashi.

Bethlehem indang star tasazükji feet 47 lir aser northeast nung "Christmas Star"

tulutiba lir, ta paisa ashi.

Iba ya "Advent Christmas" tenüing nung yanglu aser tangatetba tajung aser nübortem longjema alitsü osang sangoktsütsü teimla agütsütsü nükjidong nung yanglu ta Assam Rifles sangdong ka nung metetdaksü.

Yaküm Northeast nung Covid tenokdangba ajanga Christmas benjung memongtet.

Nisungtemi Lunglei nung yanglua aliba petinu reprangtsü atema kanga arur.

Assam Rifles-i Christmas osang prokshiba atema nisungtemi pelaba metetdaksüogo.

**BILEMTETER**

'Taküm teti asoshi masü, saka Oja nü temeim ozü mulung nung teti asoshi alitsü'

Temeim Oja

Alima wadang saka mapang telatet tang Kotak lima kodanga tatem maka Majurutep tashi nü temeim, nai inyakbatem Nü tesayuba tajung nung jajatsü mesenshiba lima Kotak nung ajurutsü yimla atar.

Ozü temeim Ojala, kinungtsü aser Otsü Late. **Mrs.Sayangkala Lkr (B.S.Akala)** shiranga aruba anogo nungi tasüba anogo 8th December 2021 tashi shirnokisa nübu, rongsen, sarasadem aser tesüneptsüba O-tajung ajanga yaritepogo, nenok kija, kibong, lokti ajak tang kanga pelaba lemsar. Teyanglur Takar Tsüngrem-i nenok ajak moajangma.

Temeim Kinungbo, Jala-jabaso, Anükapangtem, semchirtem aser kinungertem

Shalom Public School nung Annual Day mungogo

Dimapur, Luchii/December 16, 2021 (TYO): Shalom Public School Chümoukedima-i "Moulding a star" omen nung ajemdaker Bodhbarnü (15.12.2021) 9buba Annual Day benjungmung sentong ayonga agiogo. Iba benjungmung sentong nung tongti tesemdanger ama EAC Chümoukedima, Seyiekhrietuo Solo aruagi aden, ta sangdong ka ajanga metetdaksü.

Iba sentong nung Shalom Public School kaketshirtemi shilem balala agia liasü. Temeshi Laishiba nungi Yosef taküm aser pa teti nung indang otsü nung ajemdaker kaketshirtemi musical drama ka sayuogo.

Iba sentong nung Bambino Swu menden liasü. Sentong tenzüka class 7 nungi Imsurenla Longkumer-i Tsüngremi temoatsü meshizüka sarasadem aser Shalom Public School, Headmaster, Mhondamo Lotha-i telok pela agizük.

Iba sülen, Music teacher, R. Tali Longkumer-i ketdangsüa School Choir-i chorale tena liasü. Directress, Merenla Longchar-i okila jembiba mapang, kaketshirtem nem tesayuba tajung agüja aser tamendakdak takang yanglutsütsü atema tesayur aser tsürabur temi tongti shilem agiba indang lai metetdaksü.

Kasa sentong nung tongti

tesemdanger, EAC Chümoukedima, Seyiekhrietuo Solo-i, kaketshirtem anitetsü asoshi tesayuri inyakba aser sayuba dak tuluka keta lir, kechiyong sayutsü sempet/tasa maliba ajanga graduate ser mapa mangur aika lir, ta ashi.

Libajen merüka ayutsü asoshi lokti indang tim inyakym nung anidaksüla aser temaba jenjang tongtettsü aser nisung rongnung züngshitsüsa kaketshirtemi meranga inyaksüla, ta Solo-i ajungshia liasü.

Iba sentong tembanga class 6 nungi Lerina Yim-i sarasadema liasü, ta kasa sangdong nung shia lir.

Mokokchung nung SYA-i "Winter Carnival 2021" ayongzük

Sangtemla Youth Association (SYA)-i ayongba mezüngbuba "Winter Carnival 2021" Sangtemla Ward Chairman, Wb. Imliyanger-i tenzüksüdag.

Mokokchung, Luchii/December 16, 2021 (TYO): Sangtemla Youth Association

(SYA)-i ayongba mezüngbuba "Winter Carnival 2021" Dec 16 aonung Sangtemla Ward

Chairman, Wb. I. Imliyanger Jamir-i Mokokchung town hall nung meraketa tenzüksüogo.

Iba Carnival nung chiyungtsü tapu balala ayokdak (food stalls), asaya tapu balala asayadak (game zone), tambola, tanurtem atema kids corner balaka, osetsüset aser sempet tapu balala dokan-tem, noksa tangokdak aser ano kentenmenü balala atema live show nungertem alitsü.

Asenok mapang talangka alima wara ajanga kidang shibanger moktepogo, anungji, khen sütöksünema benjongteptsü aser iba carnival mapang tenla süngden (donation box) ka yutsütsü aser iba nungi aruba tenla jagi Sangtemla ward nung kaketshir class 10 & 12 pur nem coaching class ka ayonga katsütsü nükjidong lir, ta SYA ketdangsür kati osangbener

den jembidang metetdaksü.

Iba carnival ya Dec 18, 2021 tashi aonung 5:00 ako nungi 9:00 ako tashi alitsü. Mezüng aonung nungtugu tsüngsanger Meyitemsi Naga-i shilem agitsü, Dec 17 aonung "Oldies Night" ta sür band tejen kari shilem agitsü aser Dec 18 aonungji tawa tanü kanga tetshiba "Kazüküptok" ta sür menüshishi aiba (comedian) teloki shilem agitsü sentong renema lir.

Iba benjong ya sorkari latetja akaba teinyaktsütem (SOP) shitak amshia akatsü, anungji, tulu-tila ajak pela shishia jaoker, ta tayongertemisa ayongzük metetdaksü. Iba carnival sentong moaja Rev. Luin Jamiri sarasademsü.

Northeast Zonal Senior National Basketball Championship tenzükogo



Dimapur, Luchii/December 16, 2021 (TYO): Brehostibarnü, St. Anthony's HSS, Shillong nung Northeast Zonal Senior National Basketball Championship asayamung tenzükogo. Meghalaya Basketball Association (MBA) ajanga ayongba mezüing asaya nung Mizoram tebur team-i point 8 agi Tripura tebur team madak 124 - 116 agi takok angu. Tanabuba match nung Meghalaya-i Manipur madak 72 - 47 agi takok ngua liasü, ta sangdong ajanga metetdaksü.

Iba Championship lapokba

sentong nung, Meghalaya Chief Minister, Conrad Sangma tongti tesemdang ama dena liasü. Iba Zonal Championship nung tajungtiba shilem agitsü asoshi pai asayartem ayongzük aser saisapong ajanga nisung ka jakla/yimya yanglutsü asoshi nungitter, ta ashi.

Tarutsü nung Northeast nungi basketball asayar timbai National jenjang nung shilem agitsü imlar, ta Sangma-i lemsatop.

Kasa asayamung tetsür asaya nung, tayonger team Meghalaya-i ayong ayonga dang 54-26 agi Mizoram tsükdaksü.

Tebur match tanga ka nung Assam aser Nagaland tsüingda kanga toktepa asaya liasü. Ajisüaka, Assam-i Nagaland madak 97 - 64 agi takok angu. Assam atema B. Singh aser M. Kumar nati point 20 aser 19 idaksü. Kasa asaya nung Nagaland atema Seyie Kire-i point 18 aser K. Belho-i point 14 idakja liasü.

Iba anogo asaya tatembuba nung, Meghalaya tebur team-i Tripura tebur team madak takok angu. Iba asayamung December 19, 2021 tashi asayatsü, ta kasa sangdong nung shia lir.

Changtongya Volleyball Association-i Dr. Imkongliba Ao Memorial Open Volleyball Trophy kokogo

Dimapur, Luchii/December 16, 2021 (TYO): Changtongya Volleyball Association (CVA)-i 2buba All Nagaland Dr. Imkongliba Ao Memorial Open Volleyball Trophy kokogo. CVA-i tanabenbuba iba Volleyball Trophy takok angur asütsü. Dimapur District Sports Complex (DDSC) nung December 13 nungi 15, 2021 tashi Japukong Youth Organization (JYO) ajanga iba asayamung ayongzük, kong CVA aser MH10 Kohima na final asaya liasü, ta sangdong ka ajanga metetdaksü.

Iba asayamung tongti tayonger (chief host) aser asayamung atema senotsü agi nungitta yarir, Minister for Higher Education & Tribal Affairs, Temjen Imna Along-i, Dr. Imkongliba ya nungtugu aser nükla tulu aliba nübu ka ama ni züingshir; Naga nungeri pa (Dr. Imkongliba) kodanga mamatetsü aser pa bilemteta iba asayamung ayongzük liasü, ta ashi.

Iba asayamung nung shilem

agir ajak dang pai pelaba metetdaksü aser State nung saisapong ka ama Volleyball ajungshitsü asoshi team ajak 'stakeholders' ama züingshir aser iba asayamung ajanga national aser international level tongteta asayatsü asoshi saisapong (tetsür aser tebur) tajung adoktsü imlar, ta ashi.

Minister Along-i, tawa, sekretariat office nung secretary of sports den jembia liasü, kong Naga nungeri saisapong nung temulung magütsüba aser jangrabangra maliba osang Centre Sorkari angazüka mepelai liasü, ta sasasete bilemba lemsatop.

Iba dak sendakba nung pai, 'stadium, sports hall aser moapu (ground) yanglutsü asoshi State Sorkar mesüra Centre Sorkar kijai dang shilem agitsüla ta mali, ta ashi. Saisapong wadang nung temulung magütsü, saisapong atema kisüjensü/kiojen tem yangluba ya terenlok maparen ka ama dang sayura, item kisüjensü ajak tagidak maka/amajok dang akümtsü, ta pai

metetdaksü.

"Asenoki asayaba saisapongtem bendanga dang agüja asayara, State nungi Olympics sabang nung shilem agitetti asayar takotet adoktsü aser asayamung tulutiba (Olympics) nung shilem agiba kisüing masü, saka gold, silver aser bronze medal angutsü ta niibo amanger, koba alima nung tetsür aser tebur saisapong tajungtiba nem item medal agütsür," ta Along-i shisem.

Iba Memorial Trophy ya asayamung ka ama tanü dang masü tarutsü nunga takok ngua asayatsü imlar, ta pai ashi.

Maneni, iba sentong nung Rongsenmongla Jamir menden liasü aser sentong tenzük Rainbow Coaching Centre, proprietor Moala Longchar-i sarasadem. Dimapur Japukong Senso Telongjem, President, Temjentoshi-i o jembi aser Imli K Imchen-i ken ka aten. Planning Committee, Convenor, Z Temsu Jamir-i tepela anküp o jembi, ta kasa sangdong nung shia lir.

2022 Australian Open nung Karolina Pliskova masayatsü

New Delhi, Luchii/December 16, 2021 (Agencies): Sangküm mezüing asayamung atema training agiba mapang teka yiruba sülen, taruba ita (January 2022) Australian Open nung world no. 4 Karolina Pliskova masayatsü.

Brehostibarnü, Australian Open ketdangsürtemi world no. 4 Karolina aruya aliba asayamung nungi tukadokba osang jangjatsü aser Twitter nung, "iba timtem nungi na (Pliskova) yakta taneptsü

angutsü sarasademtsür," ta lemsatopa liasü.

Social media sabang nung, Pliskova-i, "yashi practice agiba mapang tia makai teka achjilen yiru aser taruba Adelaide, Sydney aser Australian Open asayamung nung masayatetsü," ta lemsatop.

Arishi küm 29 tain Czech Republic tsür Pliskova-i anaben tashi Grand Slam final asayadanga lir. Taküm Wimbledon final nung Pliskova-i world no 1 Ash Barty makok

aser 2016 küm U.S. Open asayamung semi-final nung Pliskova-i Serena Williams tsükdaksüba sülen, final nung lai Angelique Kerber makok.

2019 küm Melbourne Park asayamung nung Pliskova-i semi-final tongteta asayaogo. Quarter final nung Pliskova-i Williams madak takok angu saka semi final nung Naomi Osaka-i la tsükdaksü.

Sangküm Australian Open asayamung ya January 17, 2022 nungi tenzük asayatsü.

2buba Tesen Super League tenzükogo

Tening, Luchii/December 16, 2021 (TYO): Tesen students Unions (TSU) ajanga ayongba 2nd Tesen Super League Bodhbarnü (15.12.2021) tenzükogo. Iba League lapokba sentong nung alakteta tejaoker ama Election Office, Peren indang H.A, Aro Zeliang dena liasü, ta sangdong ajanga metetdaksü.

Aro Zeliang-i, saisapong ajanga nübur nem angazükdaksür aser longjemtsü asoshi ajungmesor, ta ashi.

Maparen/inakyim ajanga nung terenlok lia aser takok angutsü asoshi pei sasa meranga inyakbaji ajak dang tongtibangtiba lir, ta Zeliang-i

ashi aser Tesen tesem nung saisapong ajungkettsü nükla yur iba League ayongzükba atema pai organising committee dang pelaba metetdaksü.

Tesen nung tantsü-tambu aser asayamung board ketdangsür matsüingdang Zeliang-i iba asayamung tenzükja liasü.

Tesen Super League tenzük defensing champion, Rising FC (New Tesen) aser Mbaulwa na asaya liasü. Iba asaya nung Rising FC-i Mbaulwa madak goal 2-0 agi takok angu. Rising atema Namzuyibe Putlang aser Kesangrangbe Putlang nati goal ka ka idaksü.

West Indies team nung nisung pungo dak Covid-19 putet

New Delhi, Luchii/December 16, 2021 (Agencies): Brehostibarnü, tesemdang team - West Indies indang züingsem 5 dak Covid-19 positive putetba sülen, Karachi nung iba limited-overs series maneni asayatsü asoshi Cricket West Indies aser Pakistan Cricket Board tsüingda jembishinüdar.

West Indies-i T20Is ana tashi asayaogo aser parnoki ano Pakistan nung T20I ka den ODIs asem asayatsü lir.

Inyakyim agi melaba ama, Bodhbarnü asayar aser staff tem Covid-19 tendangba sülen, Brehostibarnü wicketkeeper Shai Hope, spinner Akeal Hosein aser all-rounder Justin Greaves den külemi assistant coach Roddy Estwick aser physician Akshai Mansingh nungur dak iba tashidak puteta liasü.

T20Is aser ODIs atema Pakistan tonga arur sülen, fast bowler Sheldon Cottrell aser all-rounders Roston Chase den Kyle Mayers nungur dak Covid-19 positive putet.

"Asayar asemprongla ya taruba match nung shilem magitsü aser züingsem pungo (Brehostibar putetertem) ya West Indies squad züingsem tanüingba nungi pilar anepalutsü," ta CWI sangdong ka ajanga metetdaksü.

"PCR test nung negative osang maru tashi parnok ajak anogo 10 tashi quarantine asütsü," ta kasa sangdong nung shia lir.

Brehostibarnü, Karachi nung tasembuba T20I asayatsü ghonda ishika lia, Cricket West Indies-i iba tour thinena atatsü asoshi tebilemba lemsatopogo.

Taküm küm tetenzüklen, security dak sendakba nung tebilemstü adokba ajanga New Zealand aser England team napronglai Pakistan nung cricket asayatsü asoshi sentong thitemja liasü. New Zealand team pur Rawalpindi tonga aru aser team ana tsüingda (Pakistan aser New Zealand) ODI series indang mezüing match tenzüktsü ghonda ishika lia New Zealand team pur meyipa oadok.

Oxygen agi anüingba... (Tapak 7 nungi...)

Tamalen Samajwadi Party (SP) lenir, Udayveer Singh-i, "Uttar Pradesh sorkari Agra nung aliba Paras Hospital anema inyakogo, kechiyong doctor kati sayaba video ka kanga prokshia liasü. (Iba hospital nungji) Shiranger tesadang nem oxygen agütsü aser tanüingba tesadang shi asü. District magistrate tetuyuba ajanga oxygen supply anena liasü," ta metetdakja

liasü. Deepak-isa, minister temi oxygen agi anüingba indang shidi ajanga metetdaksüba tai asü, ta asüingdanga liasü saka telangzüba magütsü.

Senden nungsa SP MLA tei Lakhimpur Kheri tatalokba nung ajemdaker Union minister of state for home Ajay Mishra Teni minister menden nungi anentsütsüla, ta takhangba agütsü.

BILEMDANGANG

"Bendanga agütsür inyakra tamakok meshimeshia mali."